



Inatsisartuni ilaasortaq Aleqa Hammond, Siumut

§ 37 naapertorlugu apeqqummut nr. 2012-016-imut akissuteqaat, London Mining

Asasara Aleqa Hammond,

Inatsisartut Suleriaasianni § 37 naapertorlugu Naalakkersuisunut matuma kingulianiittunik London Mining-imut aammalu Isukasiani saviminissamik piaanissaasinnaasumut tunngasunik Naalakkersuisunut apeqquteqarputit.

Apeqqutinut tunngavilersuutinni isumaqarputit innuttaasut aammalu Inatsisartuni ilaasortatut aatsitassarsiornermut suliassaqaarfimmi suliat ingerlasarnerannut tunngatillugu paasissutissanik pissarsiniarneq killeqarpallaartoq.

Taamaattumik aallarniutigalugu innuttaasut aamma Inatsisartuni ilaasortat aatsitassarsiornermut suliassaqaarfimmi ukiumi qaangiuttumi paasissutissanik pissarsinissamut periarfissarisimasaat nassuiaatigissavakka.

Pingaartumik Inatsisartuni ilaasortat 2011-imi ukiaanerani suliassat angisoorsuit pillugit isumasioqatigiisinnearput, tassanilu suliassat (aatsitassarsiorfiit aamma uuliasiorneq) piuminarsisimasutut taaneqartartut tamarmik sukumiisumik saqqummiunneqarput aammalu Inatsisartuni ilaasortat suliassanut ataasiakkaanut tunngatillugu taamatullu misissuinissamut piaanissamullu pisinnaatitsissutinik tunniussisarnermut tunngatillugu suleriaatsinut aalajangersimasunut tunngatillugu apeqquteqarnissamut periarfissinneqarlutik. Taamatuttaaq aatsitassanut tunngatillugu akileraarusiisarnermut ilusiliaq atuuttoq saqqummiunneqarpoq.

2011-imi aggustimi Inatsisartut Inuussutissarsiornermut Ataatsimiititaliaannik ulluni sissamani aatsitassarsiornermut tunngatillugu isumasioqatigiisitsisoqarpoq, tassani ataatsimiititaliami ilaasortat ingerlatseqatigiiffinit, pisortat oqartussaasuinit aammalu soqutigisaqatigiit kattuffiinit isummernissamut tunngavissianik saqqummiivigineqarput, tamatum kingorna oqallinnissamut periarfissiisoqarluni.

Tamatuma saniatigut Kalaallit Nunaanni Sulisitsisut Peqatigiiffiat aamma Kommuneqarfik Sermersooq suleqatigalugit ataatsimeersuarneq Joining Forces ingerlanneqarpoq, tassani Inatsisartuni ilaasortat tamarmik qaaqquneqarlutik. Ataatsimeersuarneq aatsitassarsiornermut uuliasiornermullu suliassaqaarfimmi suliassanit suliariuminarsisimanerpaameersunit aallartitanit peqataaffigineqarpoq. Aallartitat suliassaatik aammalu suliassat ataasiakkaat suliap ingerlanerani sumut killiffeqarnersut saqqummiuppaat. Kiisalu aamma ataatsimeersuarnermi ullunik marlunni sivissuseqartumi aamma suliffeqarfinnik kalaallinit pigineqartunik taakkualu sulisuinik peqataatitsinissamut tunngasortai sammeneqarput.

27. januar 2012
Sagsnr. 2012-060499
Dok. Nr.

Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: bmp@nanoq.gl
www.nanoq.gl

Tamatuma saniatigut § 37 naapertorlugu apeqputini 14-usuni 2011-imi akissuteqarfigineqartuni, 2011-imi Inatsisartut ataatsimiinnerinut atatillugu akissuteqaatini suliarineqar-simasuni, tusagassiutitigut nalunaarutini saqqummiunneqartuni, tusarniaanermut nittar-takkami najoqqutassani, "Kalaallit Nunaanni aatsitassarsiornermik ingerlatat pillugit Inat-sisartunut nassuiaat"-mi ukiumoortumik suliarineqartartumi aamma AG-mi Sermitsiamilu isummersuutaasartuni paasissutissarpassuaqarpoq. Taakkua tamarmik tamanit pissar-siarineqarsinnaapput.

London Mining-imut tunngatillugu 2011-imi Nuummi marloriarluni innuttaasunik ataatsi-miittisisoqarpoq. Aammalu London Mining-ip kalaallit soqutigisaqartut ingerlaavartumik attaveqarfigisarpai aamma 2011-imi aasaanerani Kapisilinni apersuinerit il.il. ingerlan-neqarsimallutik.

London Mining-ip aatsitassarsiorfimmik suliaqarnissaa pillugu innuttaasut paasissutis-sanik pissarsinissaat periarfissinniarlugu, ulloq 4. november 2011 Nuummi H. J. Rinks-vej-imi paasissutissiinerimut allaffimmik ammaasoqarpoq. Tassani innuttaasut – aamma Inatsisartuni ilaasortat – sulisumut kalaallisut oqaaseqartuusumut suliassamut tunngatil-lugu apeqquteqarnissamik periarfissaqarput. London Mining Nuuk Ugeavis-imi paasis-sutissiinerimut allaffik pillugu ussassaarummik ilanngussaqaqaraluartoq ulloq manna tikillu-gu saaffiginnittut 13-it taamaallaat nalunaarsorneqarsimapput, amerlanerit tassaallutik inuit suliffissarsiorlut.

Naggasiutigalugu ilisimatitsissutigisinnaavara piffissami aggersumi KNR-imi aallakaatin-neqartussanik aallakaatitassianik arlarlunnik suliaqartoqaleruttormat. Aatsitassanut tun-ngatillugu aallakaatitassiat arfiniliussapput, ilanngullugu ISUA-ni suliassamik samminnit-toq ataaseq, aammalu uuliasiornerimut tunngatillugu aallakaatitassiat tallimaassallutik. Peqatigisaanik aallakaatitassiani tamani aatsitassarsiornerimut suliassaqaqarfiup iluani qulequtaq aalajangersimasooq sammineqartassaaq, soorlu assersuutigalugu avatangiisi-nik misissuineq imaluunniit Inuiaqatigiinni piujuartussamik iluaqutaasumik sunniutaasus-sanik nalilersuineq.

Naalakkersuisunut apeqput:

1) Isuani London Miningikkut aatsitassarsiorumallutik pilersaarutit pillugit tassu-ngalu suliamut tunngatillugu tusarniutit qaqugu Namminersorlutik Oqartussat nit-tartagaanni www.nanoq.gl –mi atuarneqarsinnaalissappat ?

Akissuteqaat:

Aallarniutigalugu oqaatigineqassaaq London Mining suli piaanissamut akuersissummik qinnuteqanngimmat.


Tusarniaanermut akissuteqaatit kiisalu tusarniaanermut akissuteqaammut oqaaseqaatit tamarmik, oqaatsit marluk atorlugit tusarniaanermut nittartakkamut tusarniaanermut pif-fissaliussap qaangiunnerata kingorna piaarnerpaamik ikkunneqassapput.

2) London Miningikkut aatsitassarsiornialissappata aatsitassamik pisuussummit qanoq annertutigisooq nunatsinnut aningaasatigut iluaqutigineqalissasoq Naalakkersuisut naatsorsuutigaat?

Akissuteqaat:

Kalaallit Nunaanni aatsitassarsiornifinnik ingerlatsinermut suliffeqarfiup akiliutaanik akileraarusiisarnermik atuutsitsisoqanngilaq. Akileraarusiisarnermut ilusiliaq maannakkut atuuttoq, sinneqartoorutit 37 %-annik akileraarutinut akiliisitsiviusartussa q taamanikkut Naalakkersuisuusunit, taakkua ulloq 12. februar 2009 ataatsimiinneranni Aatsitassarsiornermut periusissat 2009-p suliarineqarneranut atatillugu akuersissutigineqarpoq.

Aatsitassanut tunngatillugu Kalaallit Nunaanni nunanilu attuumassuteqartuni nunarsuup sinneraniittuni akileraarutit akitsuutillu annertussusaat ingerlaavartumik sanilliullugit misissuiffigineqartarput. Kingullermik 2011-imi misissuineramik suliaqartoqarpoq. Kalaallit Nunaata aatsitassarsiornermik ingerlatanit qaffasinnerpaamik pissarsiaqarnissaata qulakkeerneqarnissaa, peqatigisaanillu akileraarutit annertussusaata aningaasaliivigiuminartumik unammillersinnaassuseqartumillu annertussuseqartittuaannarnissaa misissuinermi siunertaapput. Nunanik sanilliussilluni misissuineq 2011-imeersoq matuma kinguliani takutinneqarpoq.



Misissuinermi paasineqarpoq Kalaallit Nunaanni akileraarusiisarnernup annertussusaa 37 %-iusooq qaffasissumiittoq – assersuutigalugu nunamit aatsitassarsiornermik ingerlatsiviusumit inerisaaviullaarsimasumit Sverige-mit qaffasinnerulluni aammalu nunanit aatsitassarsiornermik ingerlatsiviusunit angisuunit pilersitsiviullaarsimasunit soorlu Sydafrika-

mit, Chile-mit aamma Australien-imit appasinnerulaaginnarluni. Taamaattumik Naalakkersuisut maannakkuugallartoq aatsitassarsiornermut suliasaqarfimmi suliffeqarfiit akiliutaannik atuutsitsilernissamik pilersaaruteqanngillat. Taamaattorli Qeqertarsuatsiaat eqqaanni rubinisorfimmik pilersitsisinnaanermut tunngatillugu ujaqqanut erlinnartunut tunngatillugu suliffeqarfiup akiliutaannut ilusiliaasinnaasut misissorneqarsimapput. Kaaviiartitanit akitsuusiisoqassanersoq imaluunniit kaaviiartitanit aamma sinneqartoorutinit akitsuummik ataqatigiissitamik atuutsitsisoqalissanersoq aalajangerneqanngilaq.

3) London Miningkormiut pilaasinnaanermut akuersissummik pissappata sulisoqarnikkut akileraarutit qanoq annertutigisut naatsorsuutigaat?

Akissuteqaat:

London Mining-imut pilaanissamut akuersissummik tunniussisoqassappat tamatumunga atatillugu aningaasarsianit akileraarutinit aamma ingerlatseqatigiiffiup akileraarutaanik akileraarusiisoqarsinnaavoq.

Aningaasarsianit akileraarutinit tunngatillugu sulisoq Kalaallit Nunaanni inuit allattorsimaffianni nalunaarsorsimasuusimappat, taakkua Namminersorlutik Oqartussat aamma kommunit avittartussaavaat. Sulisunut nunanit allaneersunut tunngatillugu Nunap karsianut akileraarummik ilanngaasiinertaqanngitsumik akiliisoqartassaaq.

Aatsitassanut ikummatissanullu inatsimmi § 16 imm. 3 naapertorlugu pisinnaatitsissummik pigisaqartoq Kalaallit Nunaanni angerlarsimaffeqassasoq pingaarnertut malitassaavoq. Misissuinissamut akuersissummumut 2009/16-imut (Isua) maannakkut atuuttumut pisinnaatitsissummik pigisaqartoq tassaavoq London Mining Greenland A/S, tassa imaappoq ingerlatseqatigiiffik Kalaallit Nunaanni nalunaarsorsimasoq. Naatsorsuutigineqarpoq taamaattoqassappat ingerlatseqatigiiffik taanna pilaanissamut akuersissummik qinnuteqassasoq.

Isukasiani peqarfimmi pilaasoqalissagaluarpat tassunga atatillugu London Mining-imit ingerlatseqatigiiffiup akileraarutai, Kalaallit Nunaata aatsitassarsiornermi aningaasaateqarfia pillugu Inatsisartut inatsisaat nr. 6, 5. december 2008-imeersoq naapertorlugu, Aatsitassarsiornermi aningaasaateqarfimmut akiliutigineqartussaapput. Aatsitassarsiornermi aningaasaateqarfimmi isertitat malitsigisussaavaat, Namminersorneq pillugu inatsit naapertorlugu tamatuma kingorna isertitat 75 mio. koruunit qaangerneraniittut 50 %-ianik ataatsimoortumik tapiissutinut annikillissutaasussanngornissaat.

Kisiannili pilersuisuusunit kalaallinit taamatullu nunanit allaneersunit ingerlatseqatigiiffiup akileraarutai toqqaannartumik Nunap karsianut nakkartinneqartussaapput, taamatullu aatsitassarsiornermi ingerlatanit isertitat danskit naalagaaffiannut ukiumoortumik naatsorsorneqarneranni ilanngunneqartussaananatik. Aningaasat taakkua aningaasanut inatsit ingerlaavartut akuersissutigineqarnerannut atatillugu pingaarnersiuffigineqartartussaapput.

4) Kalaallinik sulisoqalernissaq qanoq annertutigisumik qulakkeerniarneqarpa?

Akissuteqaat:

London Mining-ip misissuinermit akuersissummini ingerlatassanik qinnuteqaataannut atatillugu piumasaqaataavoq Kalaallit Nunaanni suliassat tamarmik ingerlatseqatigiiffinnut kalaallinit pigineqartunut neqeroortitsivigineqartassasut. Tassunga atatillugu Aatsitassanut Ikummatissanullu Pisortaqarfik London Mining-ip neqeroortitsinermit atugasarititaasussatut aalajangersagaanni allannguuteqartitsinissamik piumasaqaateqarpoq, taamaalilluni taakkua ingerlatseqatigiiffiit kalaallinit pigineqartut sungiusimasaannut naapertuunnerulissallutik. Taamaalilluni ingerlatseqatigiiffiit kalaallinit pigineqartut suliassanut taakkununga neqeroornissaminnik immaqalu ajugaanissaminnik periarfissaqarlutussaapput, nunaqavissunik sulisoqarnerup annertunerulerneranik kinguneqartussamik.

London Mining paaanissamut akuersissummik qinnuteqassagaluarpat – tassa imaappoq London Mining-ip Isukasiani aatsitassarsiorfissamik suliqaarnera misissuinermit immikkoortumiit sanaartornermut tunisassiornermullu immikkoortumut ikaarsaartussanngorluni - taassuma suliarineqarneranut atatillugu Naalakkersuisut aammattaaq Kommuneqarfik Sermersooq suleqatigalugu "Impact and Benefit Agreement" (IBA) London Mining-imut isumaqatigiinniuutigisussaavaat. IBA tassaavoq Naalakkersuisut, kommunip (t) aamma ingerlatseqatigiiffiup akornanni suleqatigiinnissamut isumaqatigiissut. London Mining-imut suleqatigiinnissamut isumaqatigiissutip ilaatigut imarissavai kalaallinut suliffissanut, ilinniarluni sungiusarfissanut ilinniartitaanermullu anguniakkat. Suleqatigiinnissamut isumaqatigiissutip aamma imarissavai suliffeqarfinnik kalaallinit pigineqartunik peqataatitsinissamut anguniakkat. Taamaalilluni aatsitassarsiorfiup ingerlanneqarneranut atatillugu suliffissanik qulakkeerisoqassaaq, kisiannili aamma suliffeqarfiit kalaallinit pigineqartut assigiinngitsutigut aatsitassarsiorfimmu taassumalu ingerlanneqarneranut pilersuisuulernerisa malitsigisaanik "suliffissanik malittaasunik" qulakkeerisoqassalluni. Suleqatigiinnissamut isumaqatigiissutit (IBA-t) ingerlaavartumik nalilersoqqinneqartartussaapput, taamaalilluni suliffissaqartitsinermit, sungiusaanermut, ilisimasanik nuussinermit ilinniartitaanermullu anguniakkat nutaat annertunerusullu suliarineqarsinnaallutik aammalu kalaallit pilersuisuusut peqataatinneqarnerat annertusitinneqarsinnaalluni.

Naalakkersuisut 2012-ip ingerlanerani immikkut suliassanut angisoorsuarnut sanaartornissamut inatsisissatut siunnersuummik saqqummiussissamaarput, sanaartornerup immikkoortuani sulisussanik avataaneersunik atuinissamik ajornarunnaarsitsisussamik. Tamatuma saniatigut inatsisissatut siunnersuutip imarissavai aalajangersakkat suliassat sanaartornermit immikkoortuini nunaqavissunik sulisoqarnerup annertusarneqarnissamik siunnerfeqartut. Suliassat ingerlatsinermit immikkoortuini sulisitsineq tamarmi Kalaallit Nunaanni aningaasarsiatigut sulinermilu atugassarititaasut tunngavigalugit piasasoq Naalakkersuisut isumaqarput.

5) Nunanit allamiunik sulisoqarsinnaanermut tunngatillugu akissaateqartitsinissamut Naalakkersuisut qanoq pilersaaruteqarpat?

Akissuteqaat:

Suliassani angisoorsuarni illuliortiternerit sanaartornerillu pillugit Inatsisartut inatsisissaattut siunnersuummik 2012-mi saqqummiussisoqassasoq pilersaarutigineqarpoq. Inatsisissatut siunnersuutip imarissavai aalajangersakkat, sulisussanut avataaneersunut aningaasarsiatigut sulinermilu atugassarititaasussanik neqeroorutaasussanut malerua-gassiiinissamik siunertaqartut, taamaalilluni Kalaallit Nunaata ILO-mi isumaqatigiissutit

pisussaaffigisavut tamaasa malissallugit. Suliassanut angisoorsuarnut sanaartornermut inatsisissamik immikkut ittumik siunnersuuteqarnermi siunertaasoq tassaavoq, suliassani angisoorsuarni aningaasaliisernerup siuarsarneqarnissaa. Naalakkersuisut isumaqarput – inatsisissatut siunnersuummut taaneqartumut sinaakkusiussat iluanni – Kalaallit Nunaanni suliffeqarnermi sulisussanik avataaneersunik nunani tamalaani aningaasarsiatigut sulinermilu atugassarititaasut tunngavigalugit atorfinitsitsinissamik ammaassinneq, Kalaallit Nunaanni suliffeqarnerup sinnerani suliffissaqartitsiniarnikkut sunniuteqarnavianngitsaq.

Suliassat angisoorsuit ingerlatsinermit immikkoortuini sulisussanut avataaneersunut immikkut aningaasarsiatigut atorfeqarnermilu atugassarititaasussanik atuutisoqarnissaa Naalakkersuisut akuerilersaanngilaat.

Inussiarnersumik inuulluaqqusillunga
Inuussutissarsiornermut Aatsitassanullu Naalakkersuisoq



Ove Karl Berthelsen